

Dangz Goq Nanzlumz Ndeu

上林县大丰镇皇周小学 六年级 Lij Cingdingz/李婧婷



Dangz goq ceiq doeklaeng, lauxsae lij caengz daengz gyausiz, ndaw ban luenhyauyau, doengzhag lwgsai ceiq guengz, daihsing youh swenj youh hemq.

Gou ndawsim ngeix, ngoenzneix lauxsae vih-maz caengz daeuj ne? Ndaw ban yienghneix luenh

baenzlawz banh? Banhcangj sing hung hemq dwk: “Caemdingh di.” Gou laihnaeuz daihgya rox caem roengzdaeuj, siengj mbouj daengz bouxboux cungj dangq rwznuk mbouj dingqnyi. Seizhaenx, lauxsae yamq hung gipgip muengzmuengz byaij haeuj gyausiz daeuj, ndaw ban sikhaek caem ndaej fagcim doek daengz gwnz dieg cungj dingq ndaej nyi nei.

Lauxsae byaij daengz gwnz gangjdaiz, muengh-muengh gyoengq doengzhag, gig ndatheiq dwk diemj mingzcoh Lij Cinfungh: “Lij Cinfungh, mwngz daeuj gangjgangj, danghnaeuz lauxsae mbouj daeuj, ndaw ban ndaej bienqbaenz yienghlawz?” Lij Cinfungh gip dwk ndwn hwnjdaeuj naeuz: “Lumj gwnzhaw gai byaek yienghhaenx cauz.” Ciepdkw lauxsae youh diemj mingzcoh geij boux doengzhag, gyoengqde cungj gangj ndaw ban itcig cauzhoho.

Lauxsae dingq le hojsik naeuz: “Danghnaeuz lauxsae mbouj daeuj gyausiz, gyoengq doengzhag couh cauz mbouj daengx, raeuz roek (2) ban

doengzhag couh dwg buenz sa sanq ndeu, couh deng doengzhag ban' wng naeuz roek (2) ban mbouj miz cujciz mbouj miz gijliz. Gou haxbaenh youq ndaw bangunhsiz dingqnyi sou sing swenj hunggok cauzhuhu, gou youq bangunhsiz cungj roxnyinh najmong liux. Sou siengj cauz couh cauz ba, gou mbouj hwnjdangz lo.” Lauxsae ndatheiq dwk byaij ok gyausiz bae.

Dou dangseiz cungj ngaiez lo, mbouj miz vunz gamj gangj saek coenz vah, ndaw gyausiz caemdingh ndaej lienx daihgya diemheiq cungj dingq ndaej nyi. Doeklaeng, daihgya cungj dawz saw caeuj bonjlienhu okdaeuj, gag yawwsaw lienhu. Gou naemj, daihgya wnggai roxnyinh swheij guh loek luba.

Gij gijliz geng dwg gij baujcwnz gwzming ndaej hingz. Doengzyiengh gijliz hix dwg vwnzmingz aen ban ndeu, dwg baujcwnz aen cizdij ndaej cinbu. Raeuz wnggai gagrox souj gijliz. Dangz goq neix hawj dou hit caen nanzlumz ha!

(lauxsae son' gyauc: Vangz Gveiyangh)

Loqsiengj Aenbop

Gou aeu saenj mbokfaexndoek iq ndeu, yub raemxgenj, couh boq ndaej ok lailai aenbop ndeyawj daeuj.

Lailai aenbop gyaundeidei mbin youq gwnzmbwn.

Gou caen maqmuengh, aenbop sohsob mbin bae daengz gwnzmbwn. Gyanghaemh, ndaundeidei okdaeuj le, hawj ndaundeidei ndoj haeuj ndaw bop bae. Ndaundeidei rim gwnz-mbwn, aen' aen ndaundeidei youq ndaw bop migmyag, gwnzmbwn gyanghaemh couh bienq ndaej gyaundeidei dangqmaz bae.

Gvaqlaeng, gou lij aeu boq ok aen bop hunghung ndeu, rumz ci mbouj dek, daemj deng gofaex goj mbouj dek.

Gou naengh youq ndaw aen bop youh hung youh gyaundeidei neix,

Mbin bae daengz gwnzmbwn sangsang bae,

Mbin gvaq byaibya sangngaungau de,
Mbin daengz giz gou mbouj caengz bae gvaq de,

Mbin daengz giz gou mbouj rox de.

Caj vunzlai yawjraen gou naengh youq ndaw aen bop hung de, gyaundeidei lumj doenghgij bop miz ndaundeidei migmyag youq ndawde, itdingh baenzneix cam gou——

Boux lwgnyez naengh youq ndaw bop gyaundeidei de ha,

Mwngz dwg daj giz gwnzmbwn miz ndaundeidei de daeuj dwg lwi?

Gwnzmbwn gyanghaemh bienq ndaej gyaundeidei baenzneix,

Dwg mwngz coq ndaundeidei haeuj ndaw bop gyaundeidei de bae dwg lwi?

Langhnaeuz mbouj dwg daj gwnzmbwn miz ndaundeidei de daeuj,

Mwngz youh daj gizlawz daeuj ne?

Mwngz lwnh gou vei, ranz mwngz youq gizlawz?

Lwnh hawj dou dingq ba, coh mwngz heuh gijmaz?



Gou angqfwngfwng! Aenvih vunzlai cungj gyaec gwnzmbwn gyanghaemh bienq ndaej gyaundeidei gvaq doenghbaez. Hoeng, gou mbouj lwnh coh gou hawj sou rox bw, hix mbouj lwnh gij saeh gou boq bop coux ndaundeidei de bw. Guh di saeh hawj vunzlai gyaec ndeu, vihmaz hawj vunzlai rox dwg gou guh ne? Vihmaz hawj vunzlai rox coh gou ne? Gou yienghneix han ndwi——

Gou mbouj dwg daj gwnzmbwn sangsang de daeuj,

Gou hix dwg boux lwgnyez bingzciengz ndeu,

Gou daj baih ndoibya mbouj gyawj mbouj gyaec de daeuj,

Ranz gou youq gwnz ndoibya iqi ndeu bw.

(Daj 《Bonjsei Sim Lwgnyez》 (Veiz Gizlinz raiz) senj okdaeuj, Lwgfwngzmeih/卢奋长 hoiz)

Nyapnyaj Mbouj Doek Deih, Diegraeuz Engq Gyaundeidei

Cuengqhag ma ranz, gou caeuj daxmeh itmienh byaij itmienh gangj gij saeh mizyinx ndaw hagdangz, angq lai lo. Sawqmwh, gou yawjraen gwnz dieg miz aen bingzyinjliu ndeu, de youq diuz lohvnunbyaij seuqcingh neix baenzneix coegda. Gig cingcuj, neix dwg byawz gwn yinjliu liux le swnhfwngz vut go. Simcingz gou sikhaek mbouj sangj lo. Gou gag gangj gag naeuz: “Neix dwg byawz ha, caen mbouj gangj veiswng, dawz nyapnyaj vut gwnz dieg guhmaz ha? Henzde couhdwg doengjnyapnyaj, baenzlawz mbouj vut haeuj gizde bae ne?” Ndawsim gou gig mauzdun——gip hwnjdaeuj ba, gou miz di lau uq; mbouj gip ba, sim gou couh lumj deng maz saek youq nei. Cingq youq mwh gou mbouj rox baenzlawz guh, daxmeh dajciengj le gou. Dingq vah daxmeh le, gou mbouj lawq saek di gip aen bingzyinjliu gwnz dieg hwnj, cuengq haeuj ndaw doengjnyapnyaj bae. Diuzloh bienq seuq lo, sim gou hix bienq ndaej soengswt lo. Ciepdkw, gou caeuj daxmeh doxcaeuz dawz gij ceij gvangjgau nem youq gwnz lanzganj haenx baez di baez di sik roengzdaeuj. Gou dawz fagmid iq ndaw daehsaw okdaeuj, gvet gij ceij fwngz sik mbouj bae haenx seuq bae. Yawj diuz lohvnunbyaij caeuj lanzganj seuqsak de, gou raen va engq gyaec lo, nywj engq heu lo, gofaex hix ngaek gyaec coh dou docih dou.

(sam nienzgaep Lij Swjyenh)